

## Afriká ta Maldishoná?

E kontinente afrikano a—i ketu bai ta—sufri hopi. E sufrimentu por tin kousa natural. Aworaki mes, pa falta di yobida na Etiopia ta kalkulá ku miones di hende lo muri di hamber. Ma hende tambe ta kousa sufrimentu: guera, tur sorto di krueldat, esklabitud, pobresa, hamber kousá pa desishonnan deskabeyá di gobernantenan, AIDS epidémiko, èts.

Esakinan ta resultado di un maldishon riba Afrika? Kiko Beibel ta bisa?

1) Génesis 9:18-25 ta konta ku despues di e diluvio, Kam a wak desnudes di su tata, Noe. (Ta parse ku el a hasi esaki ku plaser.) Komo resultado Noe a pronunsiá un maldishon.

Afrika a wòrdu poblá dor di algun desendiente di Kam. Hopi hende ta kere ku e pueblo afrikano ta sufri komo resultado di e maldishon ei. Nan asta ta bisa ku nan koló mas skur ta un resultado di e maldishon.

Ma nan ta kiboká. Pa un motibu desconosí, Noe a maldishoná e di kuater **yu hòmber di Kam, Kanaan—no Kam mes**. Kanaan su desendentenan sinembargo a habitá e teritorio unda Israel ta situá i bisendario, no e region di Afrika. Pues, Noe no a plega afrikanonan. Ademas, Noe no a maldishoná otro yunan di Kam ku si a poblá Afrika.

2) Den Beibel, tin profesia kontra algun pais afrikano, por ehèmpel Etiopia i Egipto (Isaias 18-20). Ma e konteksto (Isaias 13-24) tambe ta kontené profesianan kontra otro pais ku nos no ta konsiderá maldishoná. E echu ku otro pais tambe ta kondená ta indiká ku si Afrika ta maldishoná, otro pais tambe ta maldishoná. Ademas, e profesinan ei ta dirigí spesífikamente kontra Egipto i Etiopia, no henter e kontinente afrikano.

3) Diferente afrikano ta mensioná den Beibel: Ebed-melek (Jeremias 38:7), Simon di Sirene (Marko 15:21), un oficial di korte di Etiopia (Echunan 8:27), èts. Na lugá di mensioná nan komo hende maldishoná, Beibel ta presentá den un lus positivo.

Nos sa di ningun teksto bíblico ku ta indiká ku Dios a maldishoná Afrika. Kiko anto ta e motibu pa tantu sufrimentu na e kontinente aki?

Ta impusíbel pa kontestá e pregunta ei den su totalidat. Ma sin duda un parti grandi di e kontesta ta PIKÁ...piká di kolonisadónan ku a maltratá e pueblo afrikano...piká di mandatarionan egoísta ku a hòrta rikesa di nan mes paisanonan, pushando nan mas hundu den pobresa... piká di immoralidat, kousando e epidemia di AIDS...piká di bruheria i spiritismo.

Piká tin konsekuensia. E ta afektá bo mes i otronan. Un generashon ta sufri pa motibu di piká di nan antepasadonan. Dios ta bisa ku E “...*ta bishitá e inikidat di e tatanan riba e yunan, riba e di tres i e di kuater generashon di esnan ku ta odiaMi...*” (Eksodo 20:5). Yunan, nietunan, i bisa-nietunan ta sufri e konsekuensianan penoso di piká di nan tatanan.

Ma no laga nos mostra un dede akusante riba Afrika. No kere ku nan ta pekadó mas grandi ku hende na Asia, Oropa, Merka, Latino Amerika, Antia i Aruba! **No tin pais ku no ta meresé Dios Su kastigu...anto muchu mas severo!**

Mirando e sufrimentu na Afrika, ta bon pa nos hasi nos mes e pregunta: **pakiko no ta NOS?** Pakiko Dios a haña bon pa pèmití nos skapa guera, sklavitut, hamber, pobresa, èts.? Esei ta un pregunta ku Dios SO por kontestá.

Hopi nashon di Afrika sin duda ta sufri hopi. Nos mester ta sumamente agradisidu na Dios pa Su bondat pa ku nos islanan! Segun 2 Pedro 3:9, Dios “*no kier pa ningun hende bai pèrdí*”. Tantu sufrimentu komo e bondat di Dios tin komo meta pa nos bira di nos piká i konfia den Hesu-Kristo SO pa nos no bai pèrdí. Ma si bo ta rechasá Su oferta di salbashon, no tin skapatorio. E ora ei, ABO lo ta esun ku ta sufri Dios Su maldishon!